

بسم الله الرحمن الرحيم

مركز الشفلح

بدولة قطر

يقدم

مسرحية ...

أصواتنا تصل متأخرة

(مسرحية من فصل واحد)

تأليف

مريم محمد

إخراج

ناصر عبدالرضا

(الفصل الأول - المشهد الأول)

المكان / قسم الطوارئ باحدى المستشفيات في احدى المدن العربية .

الزمان / في هذا العصر الحديث ، والذي عانى فيه المواطن العربي من المآسي والنكبات والحروب المدمرة .

يبدأ المشهد بصور مختلفة لأوجه الدمار الناتجة عن استمرارية الحرب المتواصلة في تلك المدينة البائسة ، تختلط تلك الصور المؤلمة بمزيج من أصوات صفارات الانذار والطلعات الجوية للطائرات الحربية ، ثم بعد ذلك نسمع أصواتا مختلفة للقذائف المدفعية المضادة للطائرات ويرافقها بعد ذلك دوي الانفجارات المستمرة فوق المباني المرتفعة وعلى أسطح البيوت الصغيرة وفوق أرصفة الشوارع والتي تراكت فوقها السيارات المتفحمة والمختلطة بأجساد الضحايا من نساء وأطفال وشيوخ .

تفتح الستارة فنشاهد قسم الاستقبال بقسم الطوارئ في أقصى حالة من الحركة والارتباك معا ، وبحيث نرى مجموعات من الناس وهي تدخل الى هذا المكان وذلك بهدف النجاة والاختباء مما يجري في الخارج ، ونشاهد كذلك الفوضى العارمة والتي ألفت بالمكان والمرتبطة بدخول وخروج الممرضين والمرضات وكذلك الأطباء والذين يحاولون مساعدة المرضى والمصابين من جراء ما يحدث في الخارج من قصف متواصل للطائرات الحربية على تلك المدينة .

تتواصل صفارات الانذار مع استمرارية القصف الجوي المستمر .

تختلط تلك المؤثرات بأصوات الناس والأطفال ودخول العديد من المصابين .

يدخل رجال الاسعاف وهم يحاولون اسعاف رجل مصاب فوق نقاله .

رجل مقعد يدخل الى المكان وكأنه يبحث عن شئ ما ، يحاول أن يسأل أو أن يستفسر من الناس فيصطدم بالكثير من الأشياء التي تواجهه .

رجل ضرير (أعمى) في حالة يرثى لها يدخل الى المكان وهو شبه تائه ، فيلحقه أخاه لكي يساعده على الاختباء في أقرب مكان .

تدخل امرأة وهي في حالة رعب شديد ، تمسك بابنها المصاب بمرض التوحد وتحاول البحث عن أحد الأطباء لابنها المريض والخائف في نفس الوقت .

العديد من الرجال والنساء يدخلون الى المكان والذي بدأ يضيق من كثرتهم .

القصف الجوي لا يزال مستمرا .

المكان يعج بالناس والفوضى في تزايد مستمر .

يقصف المكان بشكل مركز فيتدمر كل شئ ، تتساقط الجدران وينبعث الغبار ، صفارات الانذار تبتعد ثم تختفي تدريجيا ، ثم فجأة ، يحل الظلام الدامس بقسم الطوارئ بالمستشفى ويبدأ الصمت

فيصمت المكان

لا صوت لا ضوء لا حركة ، الغبار فقط هو الذي يغطي المكان .

بعد فترة تدب الحركة وبشكل بطيء في المكان .

الاضاءة خافتة والحركة بشكل عام بطيئة .

يخرج الشاب الضرير من بين الانقاض ، لا يعرف الا أين يتجه .

الاضاءة تسلط عليه بشكل تدريجي .

الشاب الضرير : يا جماعة .. يا ناس .. يا جماعة الخير .. لا حول ولا قوة الا بالله .. ممكن أحد

يسمعني .. (لا أحد يرد عليه) ، بل .. وش هالقذيفة اللي دمرتنا .. ما أقول

الا الله يدمرهم مثل ما دمرونا .. يا جماعة .. حد سامعني منكم .. احنا في

وين ..؟؟ لا حول .. انزين أخوي وينه ؟ يا راشد .. يا راشد .. رد علي وأنه

أخوك .. رد علي يا راشد .. لا .. امبين ان احنا في مصيبة .. ومصيبة هب

سهله .. (ثم يبدأ بمحاولة التعرف على المكان) ..

الشاب الضرير : (وهو يحدث نفسه) لا حول .. وش هالدمار اللي صадنا .. يا مكثر الناس

اللي كانوا موجودين هنيه من شوي .. لكن وين راحوا .. ليكون أنه الناجي

الوحيد بينهم .. معقول ؟ الحمد لله يا رب .. لك الحمد ولك الشكر يا أرحم

الراحمين .. بس أقول .. ليكون أنه الوحيد اللي والباقي نجوا .. ها ..

لا لا .. الله لا يقول .. بس أنه في وين ؟ تذكر يا خالد .. تذكر يا خالد انت في

وين ..؟؟ أنه أخبر أول ما نزلنا من السيارة .. أخوي راشد قالي .. ياالله ياالله

ياالله يا خالد .. تعال معاي وخلصنا ندمش الطوارئ بسرعه .. خلنا نشوف لنا

مكان ننخش فيه من هالقصف .. وأنه أتذكر .. ان الطائرات كانت تقصف كل

شئ .. والناس كانوا يشردون .. لكن لي متى بيشردون ؟ ووين بيروحون؟؟

هذا احنا شردنا ، يعني نجينا من القصف .. حسبي الله عليهم حتى المستشفيات

يقصفونها .. لكن وين بيروحون من رب العباد .. حسبي الله عليهم .. (ثم

ينتبه لنفسه) بس أنه جني نسيت نفسي .. وجني نسيت الحالة اللي أنه فيها ..

الشاب الضرير : لا حول .. وينك يا راشد .. وينك يا أخوي .. (وهو يلتفت يمينا وشمالا) .
(نسمع أصواتا متفرقة لأحدهم وهو يحاول أن يخرج من تحت الانقاض) .

(ينتبه خالد (الشاب الضرير) لتلك الأصوات) .

الشاب الضرير : ها .. جني سمعت شئ .. ؟ (الأصوات مستمرة) أحد سامعني .. يا جماعة
الخير .. ردوا علي اذا كنتوا تسمعونني .. ؟؟ (ثم نسمع صوتا من بعيد) .

الطبيب ناصر : ساعدوني .. ساعدوني .. اذا في أحد يقدر يساعدي .. أرجوكم ساعدوني ..
(الشاب الضرير يتجه الى عكس مصدر الصوت) .

الشاب الضرير : حاضرين .. حاضرين .. انت قولي انت في وين .. واحنا حاضرين علشان
نساعدك ..

(الشاب الضرير يتعثر في طريقه وهو يصطدم ببعض الأشياء التي لا يراها) .

(لا يزال صوت الطبيب يأتي من بعيد) .

الطبيب ناصر : أنه وراء منطقة الاستقبال .. انت شايف مكتب الاستقبال .. ؟

الشاب الضرير : ها .. شلون .. ؟ أي مكتب استقبال .. ؟

الطبيب ناصر : مكتب الاستقبال الموجود في مبنى الطوارئ اللي احنا فيه .. ؟

الشاب الضرير : ايه نعم .. ايه نعم .. مكتب الاستقبال .. مبنى الطوارئ ..

(الشاب الضرير تائه ولا يعرف الا أين يتجه) .

الطبيب ناصر : زين .. انت ألحين تعال ناحية مكتب الاستقبال .. وبتشوفني متقلص تحت

الطوفة ..

الشاب الضرير : الله .. الطوفه بكبرها طايحه فوقك ..

الطبيب ناصر : انت ألحين بتجي تنقذني والا شلون .. ؟؟

الشاب الضرير : ايه حاضر .. ها ذاني جايبك .. (ثم يحدث نفسه) لا حول .. وش هالورطه ؟

شاقوله ألحين .. ؟ أقول له اني عمي وما أشوف .. أخاف انه ينحبط أكثر ..

(ثم مخاطبا الطبيب ناصر) بس أقول يا الأخو .. انت يعني بخير .. يعني ما

فيك شئ .. انت صاحي .. ؟

الطبيب ناصر : انت ألحين بتجي تنقذني والا بتكلم أكثر .. أقولك الطوفه فوقه ..

الشاب الضرير : الله وكبر .. الطوفه بكبرها فوقه .. ايه حاضر .. حاضر .. هاذاني جايك ..

بس ما قلت لي .. انت في وين ألحين ..؟؟

الطبيب ناصر : لا حول .. انت ما تفهم .. أقولك وراء منطقة الاستقبال ..

الشاب الضرير : ايه ما عليه اسمح لي ياخوي .. أنه نساي شوي .. بس أقول يا أخوي .. ترى المكان مظلم شوي .. وأنه هب قادر آشوف شئ .. (ثم محدثا نفسه)

وشدعوه .. يعني لو كان المكان منور .. جان شفت شئ ..

الطبيب ناصر : انت شتقول ؟ أنه ما أقدر أسمعك عدل ..

الشاب الضرير : أنه أقول يا أخوي .. ان المكان مظلم شوي .. وأنه هب قادر اشوف شئ ..

الطبيب ناصر : يا أخوي .. اتبع مصدر الصوت .. وأكد بتجي صوبي وبتلقاني ..

الشاب الضرير : وأنه من مساعه شاسوي .. (وهو يحدث نفسه) .

الطبيب ناصر : انت شتقول ؟ أنه ما سمعك عدل ..

الشاب الضرير : (وهو يعلي صوته) أنه أقول .. اني من مساعه ، وأنه أحاول اتبع صوتك ..

وليلحين ما لقيتك وبعدين لا تنسى ان المكان مظلم .. مظلم وايد .. هب شوي

الطبيب ناصر : عيل تدري .. أنه باحاول اني أصارخ أكثر .. وانت حاول انك تتبع صوتي .

الشاب الضرير : حاضر .. ياالله ابدأ .. (وهو يستعد للتحرك) .

الطبيب ناصر : (وهو يصرخ) أنه هنيه .. أنه هنيه .. ساعدوني يا جماعه .. أنه هنيه ..

(الشاب الضرير يحاول جاهدا أن يتتبع الصوت وأثناء محاولته التحرك في كل الاتجاهات ، يدوس على قطعة اسمنتية موجودة في طريقه فيصرخ الشاب المقعد صالح والذي يكون تحتها)

الشاب المقعد : (يصرخ بشده) آه .. آه .. من اللي داسني ..؟؟

الشاب الضرير : المسامحه .. المسامحه يا الأخو .. صدقني ما شفتك .. ؟

(الطبيب ناصر لا يزال ينادي بأعلى صوته) .

الشاب المقعد : لا حول .. انت ألحين بدال لا تساعدني .. تدوسني ..

الشاب الضرير : يا أخوي قلت لك سامحني .. وصدقني ما شفتك .. وبعدين أنه عمي وما أشوف

الشاب المقعد : خلاص خلاص .. صدقتك وسامحتك .. بس أرجوك ممكن تساعدني وتشيل هالقطعة الاسمنتية من فوق ريولي .. لأنني بصراحة هب قادر أشيلها بنفسي ..

الشاب الضرير : حاضر .. انت تامر يا خوي .. (يساعد فيزيل تلك القطعة من فوق ساقيه)

الشاب المقعد : مشكور وما قصرت .. (ثم يلتفت الى مصدر صوت الطبيب)

الشاب المقعد : وشفيه هذا يصارخ من قمة رأسه .. لا يكون متعور والا فيه شئ ..

الشاب الضرير : لا الحمدالله ما فيه شئ .. بس اهو يصارخ علشان أحاول اني أتبع صوته وأوصل له .. وأحاول اني أساعده ..

الشاب المقعد : وليش انت تروح له وتساعده .. ليش اهو ما ايجي هنيه ونتساعد مع بعض ..

الشاب الضرير : يقول ان الطوفه طاحت عليه .. واهو ألحين تحتها وما يقدر يحركها أو يشيلها من فوقه ..

الشاب المقعد : الله .. الطوفه بكبرها طايحه فوقه واهو تحتها .. ؟ انزين عرفت اهو وين ؟؟

الشاب الضرير : يقول انه وراء مكتب الاستقبال .. واللي مثلك شايف .. أنه ضرير وما اشوف وأصلا ما أدل وين مكتب الاستقبال .. وبعدين خايف أقوله اني عمي وما أشوف .. يكتئب وينحبط أكثر ..

الشاب المقعد : اسمعني عدل .. انت ضرير وأنه مقعد .. لكن ربع تعاونوا ما ذلوا .. خلنا وأنه أخوك انتعاون مع بعض ,, ونساعد هالمسكين وننفذه .. ها .. شقلت ؟

الشاب الضرير : وأنه حاضر وتحت أمرك .. انت دلني وأنه حاضر ..

الشاب المقعد : وبعد .. عندي طلب صغير ..

الشاب الضرير : انت تأمر وأنه في الشوفه ..

الشاب المقعد : يعني .. وانت في طريقك .. حاول انك تلقى الكرسي المتحرك اللي ضاع مني

الشاب الضرير : نعم .. شقلت .. ؟؟

الشاب المقعد : ها .. أوهووه .. نسيت .. اسمح لي ياخوي .. أنه آسف .. ألحين تذكرت ..

الشاب الضرير : لا .. ما عليه .. أنه متعود على هالأمر .. المهم ألحين قولني وين أروح ..

الشاب المقعد : ياالله عيل .. خلنا نبداً .. اسمعني عدل .. واعتبرني عينك اللي تقدر تشوف بها

الشاب الضرير : نعم ؟ (ثم وبتأثر) وشقلت ؟؟

الشاب المقعد : وشقلت ؟ ما قلت شئ غريب .. قلت لك .. اعتبرني عينك اللي تقدر تشوف بها
الشاب الضرير : أرجوك .. أرجوك لا اكمل .. (ثم يتذكر أخاه الذي فقده) .. خلاص .. أنه
هونت .. أنه ما أقدر أساعد أحد .. أنه هب متحرك من مكاني ..

الشاب المقعد : (مستغربا) يه اشفيك .. ؟ وأنه شقلت .. ؟؟

الشاب الضرير : لا لا خلاص .. انت ما قلت شئ .. أنه بس تذكرت أخوي اللي كان معاي قبل
لا ينقصف المستشفى .. وكان دائما يردد هالكلمه اللي قلتها ونطقتها .. كان
دائما يقولي .. خلني عينك اللي تقدر تشوف بها الدنيا .. اعتبرني بصيرتك
اللي تقدر من خلالها تكتشف العالم اللي حولك .. كان دايم يشجعني .. كان
دايم يروح ويبي كل مكان .. ما كان يتركني لحظه .. كان توأم روحي ..
كانت العلاقه اللي بينا .. أكثر من علاقه الأخ بأخوه .. كانت كل أسرارنا
محفوظه في قلوبنا .. وما يعلم بها الا رب العالمين ، حتى أبونا وأمنا ما كانوا
يعرفون شئ عنها .. ياما اشتركنا في مقالب سوينها في أهلنا .. كانوا دايم
يشكون فيه ، لأنه اهو المفتاح وأنه العمي ، ومحد كان يشك فيني .. لكن عمره
ما فتن .. عمره ما علم علي .. ولين جات اللحظه اللي دخلنا فيها لهالمبنى ..
ويا ليتنا ما دخلنا هنيه .. لأن أول ما دخلنا الطوارئ .. بدأ القصف العنيف ..
بدوا اللي ما يخافون من ربهم .. يقصفون هالمستشفى .. بدوا اللي ما في
قلوبهم رحمه .. يدمرون هالمكان .. يعني ما كانوا يعرفون ان هالمكان اهو
بمثابة الملجأ الآمن للمرضى وللمصابين .. يعني ما كانوا يعرفون ان هالمكان
اهو المكان اللي يتعالجون فيه الناس .. لكن ما أقول الا .. حسبي الله ونعم
الوكيل .. حسبي الله ونعم الوكيل ،، وبين بيروحون من عدالة السماء ..
الشاب المقعد : (بتأثر) هونها .. هونها وتهون وأنه أخوك .. وبعدين شذراك .. يمكن تلاقي
أخوك في أي لحظه .. لا تفقد الأمل وأنه أخوك .. وخل ايمانك بالله قوي ..
الشاب الضرير : والنعم بالله ..

الشاب المقعد : عيل قوم ألحين وخلصنا نشوف شغلنا .. ويمكن على يدنا .. الله يكتب النجاة حق

غيرنا وأنه أخوك ..

الشاب الضرير : شورك وهداية الله .. (ثم يستدرك) بس أقول .. ما جنا رفيجنا اللي بنروح

ننقذه .. صوته وقف وماله حس ..

الشاب المقعد : ايه والله .. تدري عاد .. صوت عليه .. ويمكن يرد عليك ..

الشاب الضرير : (وهو ينادي) يا الحبيب .. بالأخو .. ياللي الطوفه طايحه فوقه .. يا الحبيب ياللي

ساكن في المنطقة اللي وراء مكتب الاستقبال .. رد علينا يا أخوي .. شدعوه ..

ما تبغيها ننقذك ..

الطبيب ناصر : (وهو يصرخ) ألحين تفرغت لي .. من عقب ما سمعتنا قصة حياتك ..

الشاب الضرير : نعم .. انت تحاجيني أخوي ..

الطبيب ناصر : لا أحاجي رفيجك اللي وياك .. واللي كان فاضي واسمك لي النهاية ..

الشاب المقعد : (وهو يخاطب الشاب الضرير) أقول .. جنه يقصدني أنه ..

الشاب الضرير : (هامسا) ما عليه .. لا تلومه وأنه أخوك .. لا تنسى ان الطوفه بكبرها

طايحه فوقه ..

الطبيب ناصر : اسمك .. اسمك .. أنه هب اصمخ .. انت ألحين بتجي تنقذني والا شلون ؟

الشاب الضرير : حاضر .. حاضر .. هاذاني جايك .. (وهو يتجه الى الطريق الخاطئ) ..

الشاب المقعد : اصبر .. اصبر وين رايح ذاك الصوب ..

الشاب الضرير : رايح آنقذه .. وين باروح يعني ..

الشاب المقعد : شلون تروح تنقذه .. وانت رايح عكس الاتجاه ..

الشاب الضرير : أو هوو .. اسمح لي يا أخوي .. نسيت .. يا الله دلني وين أروح ..

الطبيب ناصر : (وهو يعاود الصراخ) وينك .. بتجي تنقذني والا عندك قصه ثانيه بتقولها بعد

الشاب الضرير : حاضر حاضر .. هاذاني جايك ..

الشاب المقعد : أو هوو .. ترى رفيجك هاذيه مصخها .. طرار ويتشرط .. ألحين احنا بننقذه

ويسوي فينا جذيه .. عيل لو كان اهو اللي بينقذنا .. شبيسوي فينا .. ايه والله

الشاب الضرير : (وهو يهمس) ما عليه .. ما عليه .. لا تنسى الطوفه ..

الطبيب ناصر : (يفاجئهم) أسمعك .. أسمعك .. أنه قايلك من قبل .. اني هب أسمع ..

الشاب المقعد : الله .. وش هالاذن اللي عنده ..؟؟

الشاب الضرير : (هامسا) هاذي هب اذن .. هاذي الا سماعات عوده .. سماعات استيريو ..

الطبيب ناصر : (صارخا) آي .. آي .. أذوني .. أذوني .. أذوني تنزف دم .. ما أدري شصاير

فيهم ..؟؟

الشاب المقعد : أقول .. جنك عطيتّه عين ..

الشاب الضرير : يعني عالخفيف ..

الشاب المقعد : شنهو ؟؟ هاذا وانت عمي وما تشوف .. عيل لو تشوف .. شبيصير فيه ..؟

(الطبيب مستمر في صراخه)

الشاب الضرير : استر .. استر على ما واجهت .. المهم ألحين قولي وين أروح دام انه يصارخ

الشاب المقعد : روح جدام شوي .. (الشاب الضرير ينفذ ما يقوله الشاب المقعد) ايه .. وعقب

خطوتين تيامن .. روح ألحين ثلاث خطوات .. خلك رايح .. تياسر ألحين ..

ايه .. روح يسار .. وألحين لف يمين .. أقولك لف يمين تروح يسار .. ايه يمين

خلك رايح .. روح شوي بعد .. انت ألحين وصلت مكتب الاستقبال .. وعلى ما

أذكر .. بتكون هناك طوفه جدامك .. بس ما جني أشوف الطوفه جدامك ..؟

الشاب الضرير : (يلتفت للشاب المقعد) مو هاذي الطوفه اللي .. (وهو يؤمئ بكلتا يديه) اللي

فوق .. رفيجنا .. (وكأنه يشرح له بالاشارة وذلك مراعاة للمصاب) .

الشاب المقعد : ايه .. ايه .. ألحين عرفت ..

الطبيب ناصر : أوهووو .. وبعدين معاك ..

الشاب الضرير : هاذا اني .. هاذا اني قريب منك .. الا جني حذاك بعد ..

الشاب المقعد : خذلك لفه دائريه .. وبتلقاه طايح جدامك .. والطوفه فوقه ..

(الشاب الضرير ينفذ ذلك ويختفي خلف الركाम لانقاذ الطبيب ناصر)

الشاب المقعد : ان شاء الله يحصله وينقذه ..

(بعد ذلك نسمع صراخا مختلطا مع مؤثرات صوتية لسقوط الحجارة وبقايا الركام المتساقط)

(بعد ذلك يخرج الشاب الضرير وقد اغبر من تساقط الحجارة والأتربة عليه)

الشاب المقعد : ها بشر .. شصار ؟؟ والله اني خفت عليكم ..

الشاب الضرير : شصار بعد ؟؟ شوفة عينك .. تمت حصاه والا خشبه ما طاحت علينا .. وزين

اللي الله سلمنا ..

الشاب المقعد : سلامات .. سلامات ..

الشاب الضرير : الله يسلمك .. المهم ألحين .. طلعتني من هالمكان .. ووصلني صوبك ..

الشاب المقعد : انزين بس .. وين رفيجنا اللي أنقذته .. ؟؟

الشاب الضرير : يه .. ايه والله وانت الصاج .. وين راح .. هو ما طلع قبلي .. ؟؟

الشاب المقعد : لا طلع قبلك .. ولا شفت أحد غيرك طلع ..

(بعد ذلك نسمع أصواتا كثيرة تختلط ببعضها البعض ومع مؤثرات مصاحبه للأحجار وللأتربه وهي تتساقط بكثرة) .

(الشاب الضرير يهرب مسرعا من مكان تواجد ه ، والشاب المقعد يحاول حماية نفسه) .

(ثم يختبئ الاثنان خلف الركاب أو بعض السواتر الاسمنتية) .

(بعد ذلك يهدأ الوضع ويخرج الطبيب ناصر ومعه الممرضة ورجل مصاب يمشي بصعوبة)

(يقوم الدكتور بعد ذلك بمساعدة الرجل المصاب ووضعه في مكان مناسب) .

الممرضة : الحمدالله على السلامة يا دكتور ..

الطبيب : الله يسلمج .. أنه كنت حاس انكم كنتم معاي في نفس المكان .. لكني ما كنت شايف

كل شئ بوضوح .. والحمدالله اني قبل الضربه الجويه .. كنت موجود في زاوية

المكان .. وانتو كنتوا في الزاوية المقابله ..

الممرضة : ايه نعم .. وكنت توني باديه أعالج هالمريض حسب أوامرك ..

الطبيب : الظاهر ان القصف دمر هالمستشفى بالكامل .. الله يستر بس .. وما تكون الاصابات

كثيره بين الناس ..

الممرضة : الله يسمع منك .. بس أقول دكتور .. المكان شبه مظلم .. واحنا ياالله ياالله نشوف

بعض .. عيل شلون بنشوف الباقيين .. ؟

الطبيب : المهم ألحين .. خلينا نكتشف المكان .. ونشوف شاللي نقدر نسويه علشان ننقذ الباقيين

المرضه : المهم الحمد لله اللي الله سلمنا .. بس أقول دكتور .. منهو هالشخص اللي أنقذك
وأنقذنا كلنا ..

الطبيب : ايه والله ذكرتيني .. أنه يالله يالله شفته .. وأول ما شال القطع المتراكمه جدامنا واللي
... .. ياريت أشوفه بس علشان أشكره انه

ك ويجاوبك ..

عليه ..

نفسه) .

تصوت علي .. أنه اسمي سعود .. وفي

وما أشوف .. لكني هب عمي عقل ولا

اكتبه لي ..

.. أنه أتشرف بمعرفتك .. بس هب لأنك

ي المقام الأول .. وإيمانك بربك كبير ..

لا اجمع في مكان واحد
بدون خروج من اعمدة
التي مبدأ بنزول قطرها من الرمي والمقعد
الدكتور جاد والمهندس
الطبيب ابراهيم
ملف الطفل
المرضى مع الطفل

ولأنك راضي بقدرك .. وبإللي الله اكتبه لك ..

الشاب الضرير : وأنه لي الشرف .. بس الصراحه .. أخلجتم تواضعنا ..

الطبيب : وأعرفك بعد على اختك المرضه منى ..

المرضه : أشكرك يا سعود .. واحنا كلنا مدينين لك ..

الشاب الضرير : لاشكر على واجب ..

الشاب المقعد : (مفاجئاً الجميع) ايه بيا من قدك .. من لقي أحبابه .. نسي أصحابه .. أالحين

نسيتنا .. ومن شوي .. (وهو يقلد سعود) يالله دلني وين أروح .. وأالحين عقب

ما قاموا يشكرونا .. نسيت كل شئ .. ما عليه .. مقبوله من زمان .. سو خير

وقطه بحر ..

الشاب الضرير : أوهووو .. اسمح لي ياخوي .. والله ما نسيتك .. وبإليتك صبرت علي شوي

الطبيب : ومنهو الأخ .. ؟ ما عرفتنا عليه ..

?

الشاب الضرير : الأخ اهو .. (ثم مستدركا) اتصدقون عاد اني ليلحين ما عرفت اسمه .. بس اذا تبغون الصراحة .. اهو صاحب الفضل بعد الله سبحانه في انقاذكم ..

الممرضة : شلون يعني .. ما فهمت ..

الشاب الضرير : أنه أفهمج .. أنه لولاه .. جان ما عرفت أوصل لكم .. ولو اهو ما شرح لي المكان .. جان ما قدرت أساعدكم أو أنقذكم على قولتكم ..

الطبيب : يعني اهو .. كان العين المفتحة بالنسبه لك ..

الشاب الضرير : ايه نعم يا دكتور .. صدقت .. اهو بالنسبه لي .. كان بمثابة العين اللي شفت بها الطريق .. الطريق اللي وصلني لكم ..

الطبيب : والنعم فيه .. والا أقول لكم .. والنعم فيكم انتوا الاثنين .. لولاكم .. ولولا تكانفكم وتوازركم .. جان ما قدرتوا تسوون شئ .. واحنا نشكركم انتوا الاثنين ..

الشاب المقعد : عيل ألحين أقدر أعرفكم بنفسي .. أنه أخوكم صالح .. أنه واحد مقعد .. ومن يوم ما ولدتني أمي وأنه على هالحاله .. وعيت على الدنيا وأنه مالي صديق الا الكرسي المتحرك .. (ثم وهو يغالب دموعه) بس لأول مره في حياتي أحس اني صرت وحيد .. صرت وحيد في هالدنيا من دون كرسي .. أنه ما أقدر أتحرك من دون هالكرسي اللي ضاع مني وفقدته .. أنه من دون كرسي أحس اني باكون عاله على الجميع .. أنه أكره اني أكون عاله على الجميع .. أنه لازم ألقى كرسي المتحرك اللي فقدته وضاع مني .. لازم ألقاه .. أرجوكم ساعدوني .. أرجوكم ساعدوني اني ألقى الكرسي المتحرك .. أنه بدوته ما أسوى شئ .. أرجوكم .. أرجوكم ..

الطبيب : (يقترب منه) لا تقول جديه يا صالح .. تعوذ من ابليس وأنه أخوك .. احنا كلنا معاك وكلنا بنساعدك ..

الممرضة : لا يا صالح .. لا تقول جديه .. انت مبين عليك ورغم اعافتك انك انسان قوي .. اعتمد على ربك .. وخل ايمانك بالله قوي .. وأكد بتلقى صديقك الوفي .. أقصد صديقك الكرسي ..

الشاب الضريير : (يقترب منه) شوف عاد .. اذا تبغيني آعتبرك العين اللي أقدر أشوف بها
طريجي .. لازم تعتبرني بمثابة صديقك الكرسي اللي ما تقدر تستغني عنه ،
ها .. شقلت ..؟؟ آعتبرك وتعتبرني .. والا مافي صداقه بينا ..

(لحظات من الصمت) .

الشاب المقعد : خلاص اتفقنا .. أنه العين وانت الكرسي .. (يفرح الجميع ويضحكون) ..
الطبيب : وألحين يا جماعه .. لازم انتعاون كلنا علشان ننقذ أنفسنا .. ونطلع من هالمكان ..
ونحاول بعد ننقذ الآخرين اذا قدرنا .. ها .. شقلتوا ..؟؟

الشاب الضريير : احنا كلنا تحت أمرك .. قول وأمر ..
الطبيب : ما عليكم أمر .. أولا .. منى .. انتي لازم اتباعين علاج هالمريض اللي كان معاج
قبل الضربه الجويه ..

الممرضة : (وهي بجانب الرجل المصاب) أنه بديت من قبل لا تقول ..
الطبيب : حلو .. وانت يا صالح .. أبغيك فعلا تكون العين المبصره بالنسبه لسعود .. وتحاول
انك تدليه الطريق الصحيح .. وعلشان ينقذ الآخرين وينتشلهم من تحت الأنقاض ..
الشاب المقعد : حاضر يا دكتور ..

الطبيب : وانت يا سعود ..

الشاب الضريير : أنه راح أكون أفضل كرسي متحرك ..
الشاب المقعد : بايخه .. يعني تبغي تستخف دمك .. هب وقته ..
الشاب الضريير : ما عليك منه يا دكتور .. أمرني وأنه تحت أمرك ..
الطبيب : ما عليك أمر .. المهم .. سمعوني عدل ألحين .. بما أني أشتغل في هالمستشفى .. فإنه
آعرف المكان عدل .. وعلشان جذبه أنه راح آتحرك بحريه شويه ,, وراح أحاول
اني ألقى أي مخرج .. وعلشان نطلع من هالمكان ..

(بعد ذلك نسمع صفارات الانذار ودوي الانفجارات وأصوات الطائرات تأتي من بعيد) .

(يتفاجئ الجميع ويحاولون الاختباء) .

الطبيب : (وهو يصرخ) ناموا .. ناموا على الأرض .. حاولوا تروحون للزوايا .. ياالله بسرعه

(حاله من الفوضى تعم المكان)

(يفترق الجميع ما عدا الرجل المصاب فهو ما يزال مرميا على الأرض)

(تقترب أصوات الطائرات وصفارات الانذار تتزايد ونسمع كذلك أصواتا لسيارات الاسعاف)

(ثم بعد ذلك نسمع صوتا قويا لانفجار قوي ، وهو بمثابة الضربة الثانية للمستشفى)

(تتساقط الأشياء وترتفع الأدخنة) .

(تبتعد الأصوات ثم تبدأ لحظات من الصمت الرهيب ..) .

(نهاية المشهد الأول)

(الفصل الأول - المشهد الثاني)

(حاله من الصمت تخيم على المكان ، بعد ذلك يدخل الطفل غانم الى المكان الشبه مظلم ، وغانم هو الطفل المصاب بمرض التوحد ، يدخل بحذر شديد وهو في حالة يرثى لها ، ينظر الى اليمين والى الشمال ، يستكشف المكان بحذر ، وعندما يطمئن الى عدم وجود أحد ، يخرج من المكان ، وبعد لحظات يعود مرة أخرى الى المكان ، ولكنه هذه المرة ، يأتي وهو يدفع بالكرسي المتحرك الى الأمام ، يضع الكرسي في مكان معين ثم يبتعد عنه قليلا ، يتأمل المكان مرة أخرى ، يرى الرجل المصاب المرمي على الأرض ، يخاف من هذا المشهد ، يبتعد قليلا ثم يقترب من الكرسي المتحرك ، يجلس على الكرسي المتحرك وهو في وضعية القرفصاة ، يغمض عينيه من التعب) .

(بعد ذلك نكتشف بأن الممرضة منى كانت تراقب ما يحدث ، حيث أنها تدخل أثناء وجود غانم في المكان) .

(بعد ذلك تخرج من مكانها وتتجه لتطمئن على الرجل المصاب) .

(بعد ذلك يخرج الشاب المقعد صالح وهو يزحف فرحا برؤيته لكرسيه المتحرك) .

الشاب المقعد : الكرسي .. الكرسي يا منى .. ساعديني واللي يسلمج .. ساعديني علشان أقعد على الكرسي ..

الممرضة : (وهي تتجه اليه وتمنعه من الاقتراب من الكرسي) لحظه .. لحظه يا صالح ..

الشاب المقعد : أي لحظه الله يهداج .. أقولج الكرسي وتقولين لي لحظه ..

الممرضة : يمكن هالكرسي المتحرك هب لك .. يمكن هب كرسيك ..

الشاب المقعد : شلون .. ؟ انتي شتقولين .. ؟ هالكرسي لي يعني لي ..

الممرضة : وهالطفل اللي نايم على الكرسي ..

الشاب المقعد : شفيه .. ؟

الممرضة : اهو اللي جاب الكرسي ..

الشاب المقعد : وشنهو يعني .. أكيد لقاه من عقب الضربة الجويه .. الكرسي هاذيه ملكي أنه ..

الممرضة : أنه أقول نصبر شويه .. وأول ما يقوم من النوم .. نستفسر منه ..

الشاب المقعد : وأنه أقول نوقظه ألحين ونسأله .. أنه هب قادر أصير أكثر من جديه ..

الممرضة : أرجوك يا صالح لا تستعجل .. احنا ألحين في أزمة .. ولازم نساعد بعض ..

الشاب المقعد : بس أنه تعبان ومحد حاس فيني .. أنه أول ما شفت الكرسي .. ردت فيني

الحياة .. أنا من دون هالكوسي انسان عاجز .. تعرفين يعني شنهو انسان

عاجز ..

المرضه : أرجوك يا صالح .. أرجوك لا تقول جزيه عن نفسك ..

الشاب المقعد : أنه طول عمري أعاني .. وراح أظل أعاني أكثر .. ليش محد راضي يفهمني

في هالحياة .. ليش أنه اللي دايمًا أضحى .. ليش الغير ما يضحون علشاني ..

المرضه : (تقترب منه) انزين .. ممكن تهدأ ألحين .. وتخليني أتصرف معاه .. (وهي

تقصد الطفل غانم المصاب بمرض التوحد والذي ينام فوق الكرسي المتحرك)

(بعد ذلك نسمع الضوضاء لدخول الشاب الضريير سعود وهو يدفع بالسريير الخاص بالمرضى أمامه ، انه يتجه بالسريير يمينا ويسارا ويصطدم بأشياء كثيرة أمامه) .

(الطبيب ناصر يحمل مجموعه من الكراتين الصغيره المليئة بالأدويه وهو يجري ويلحق

بسعود ويقوم بتوجيهه ، ولكن سعود لا يزال يدفع بالسريير الطبي وبدون تحكم) .

(الجميع يتحاشون سعود وهو لا يزال يدفع بالسريير الطبي في كل الاتجاهات) .

(يستيقظ الطفل غانم ويخاف مما يحدث فيجري مسرعا للخارج وهو يصرخ) .

(الممرضه منى تسرع وراءه) .

(الطبيب ناصر لا ينتبه لخروجهما وذلك لملاحقته لسعود) .

(بعد جهد قصير يستطيع الطبيب ناصر أن يمسك بسعود ويأخذ السريير الطبي منه) .

الطبيب : انت شفيك ؟ ذبحتنا يا سعود .. ما خليت أحد ما دعمته ..

الشاب الضريير : ايه شاسوي .. السريير ما فيه بريك .. حاولت أوقفه ما قدرت ..

الطبيب : المهم ألحين .. ممكن تساعدني نشيل هالمريض من الأرض ونحطه فوق السريير

الشاب الضريير : انت تامر يا دكتور .. (ثم يقترب من الدكتور) وينه يادكتور ..؟؟

الطبيب : اقرب شوي وبتلقاه جدامك .. (يقتربان من المريض ثم يحملانه ويضعانه عالسريير)

الطبيب : مشكور يا سعود وما قصرت ..

الشاب الضريير : لا شكر على واجب ، أقول دكتور .. وين الربع؟؟ ما جني أسمع صوتهم ..

الطبيب : وانت خليت أحد .. دشيت عليهم بهالسريير .. ونثرتهم كلهم ..

(الطبيب ينتبه لوجود الكرسي المتحرك في طرف المكان)

الشاب الضرير : بس أقول .. معقول ان صالح هب موجود بعد .. ؟
الطبيب : لحظه .. لحظه .. عندي لك خبر لا يقدر بثمان يا سعود ..
الشاب الضرير : لا تقول .. لا يكون صالح شرد .. ؟
الطبيب : أقولك خبر لا يقدر بثمان .. وانت تقولي .. لا يكون صالح شرد ..
الشاب الضرير : يعني .. ممكن هذا يكون خبر .. لا يقدر بثمان على قولتك ..
الطبيب : الكرسي ..
الشاب الضرير : الكرسي .. وشفيه الكرسي .. ؟
الطبيب : الكرسي يا سعود ..
الشاب الضرير : خير يا طير .. شفيه الكرسي .. ؟؟
الطبيب : (مكررا بفرح) الكرسي ..
الشاب الضرير : يه جنك مصختها يا دكتور .. اخلص .. شفيه الكرسي .. ؟؟
الطبيب : كرسي صالح ..
الشاب الضرير : أنه .. (ثم مستدركا) أقصد .. أنه وأخوي صالح اتفقنا انه يكون اهو بمثابة العين اللي أنه أشوف بها .. وأنه أكون بمثابة الكرسي بالنسبة له ..
الطبيب : واذا اهو لقي كرسيه المتحرك الحقيقي .. ؟
الشاب الضرير : بتكون انتهت صداقتنا .. ولا جني قابله أو قابلني ..
الطبيب : انت اتخربط شتقول .. ؟؟
الشاب الضرير : أقصد .. أكيد بنفرح كلنا .. وأكيد ان هذا الخبر لا يقدر بثمان على قولتك ..
الطبيب : ايه .. هذا الكلام الصح .. بس تعال .. اهو في وين ألحين .. ما جنه موجود هنيه ؟؟
الشاب الضرير : هب موجود هنيه .. لا يمكن .. وين بيروح يعني .. (ثم ينادي عليه) ..
يا صالح .. يا الحبيب صالح .. أين انت يا صاحب الكرسي المتحرك .. أين
أنت يا رجل .. ؟؟
الطبيب : (وهو ينادي أيضا) يا صالح .. وينك يا صالح .. ؟؟
(يدخل صالح الى المكان زاحفا وهو يبدو على غير عادته) .

(يكتشف الطبيب ناصر بأن صالح يبدو في حالة أخرى)
الشاب الضرير : يا صالح .. وينك ياخوي .. تراك مصختها ..
(الطبيب ناصر يقترب من صالح)
الطبيب : شفيك يا صالح .. ؟
الشاب المقعد : ما فيني شئ يا دكتور ..
الشاب الضرير : الله .. أخيرا بينت ورديت علينا ..
الطبيب : يعني ما أشوفك فرحان من عقب ما شفت الكرسي ..
الشاب الضرير : لأنه معتبرني أنه الكرسي يا دكتور ..
الطبيب : سعود ..
الشاب الضرير : أمزح معاك يا دكتور ..
الطبيب : اشفيك يا صالح .. وليس هب راضي تقرب من كرسيك ..؟؟
المرضة : (بشكل مفاجئ تدخل ومعها الطفل غانم) أنه اللي باقولك ليش ..؟؟
(الجميع يلتفت إليها) .
المرضة : اتفضل يا غانم .. أولا أعرفكم بصديقنا الجديد غانم .. وغانم يا اخوان اهو اللي لقي
الكرسي المتحرك لصالح .. وجاي بنفسه علشان يقدم هالكرسي لصالح ..
(الجميع يراقب غانم وهو يتجه بحذر الى الكرسي ، ثم يدفع به الى ناحية وجود صالح)
(يفرح صالح لذلك ، ثم يقترب كل من ناصر ومعه سعود وكذلك الممرضة ويساعدون صالح
للسعود وللجلوس على الكرسي المتحرك) (الجميع يصفق لصالح وهم فرحين) .
(الطفل غانم يبتعد عن المجموعه) .
(تنتبه الممرضة لذلك فتحاول الاقتراب منه ولكنه يمنعها ويبتعد عنها) .
(الطبيب يحاول الاقتراب منه)
الطبيب : تعال يا غانم .. تعال ..
(غانم يرفض الاقتراب منهم)
غانم : أبغي أمي .. وين أمي .. ؟ أبغي أمي .. أبغي أمي ..
الطبيب : أمك موجوده .. وأكد ألحين تدور عليك ..

غانم : لا .. أمي كانت معاي هنيه .. بس ما أدري وين راحت .. ؟

الشاب الضرير : لا حول .. لا يكون بس ..

الطبيب : (مقاطعا) سعود ..

الشاب الضرير : حاضر .. أنه آسف ..

غانم : لا أحد يقرب صوبي .. أنه أبغي أمي .. وين راحت أمي .. ؟؟

الشاب المقعد : لا حول ولا قوة الا بالله .. هالمسكين شذنبه انه يكون واحد من ضحايا

هالحروب القذره ..

المرضه : لا تخاف يا غانم .. احنا كلنا هنيه معاك .. وما راح نخليك بروحك .. لا تخاف يا

حبيبي .. وأكد بنلقى أمك ..

الطبيب : تعال يا غانم .. انت لازم ترتاح ألحين .. وأنه أوعدك ان احنا نساعدك .. وننور

معاك على ماما .. تعال يا غانم ..

(الطبيب يقترب منه وكذلك الممرضة)

(بعد ذلك نسمع أنينا للرجل المريض النائم فوق السرير)

الطبيب : (وهو يخاطب الممرضة) خليج مع غانم .. وأنه لازم أشوف هالمريض المسكين ..

المرضه : حاضره يا دكتور ..

الطبيب : (مخاطبا سعود وصالح) ممكن تساعدوني يا جماعه ..

الاثنين معا : حاضرين يا دكتور .. (ثم يقتربان منه) .

(الطبيب يبحث في الكراتين الصغيره عن الأدوية) .

الطبيب : تعالوا يا جماعه وقربوا شوي .. أنه أبغىكم تمسكونه عدل .. الرجال جروحه خطيره

وأنه لازم آداويه .. بس أخاف انه يتألم .. فأرجوكم تساعدوني شوي ..

الشاب الضرير : وش الأدوية اللي بتعطيه اياه يا دكتور .. ؟

الشاب المقعد : وانت شلك خص .. خلك في حالك وبس ..

الشاب الضرير : يا أخي وانت شلك خص فيني .. أنه أسأل على كيفي ..

الدكتور : ما عليه يا صالح .. خله يسأل براحته ..

الشاب الضرير : ها شفت .. الواحد لازم يسأل .. المهم يا دكتور .. ما جاوبتني على سؤالي ..

الطبيب : لازم أولا أعطيه حقنه مهدئه .. والظاهر انه نزف وايد .. وأكد بيحتاج دم ..

الشاب الضرير : انزين شالدبره يا دكتور .. ومن وين بتجيب له دم ..؟؟

الطبيب : ما جدامنا الا احنا انتبرع له .. ها .. شرايكم يا شباب ..

الشاب الضرير : ها .. ايه .. عليك بصالح يا دكتور .. ترى دمه خاثر ومركز ..

الشاب المقعد : كفاك الله السميع العليم .. قول لا اله الا الله .. قول لا اله الا الله ..

الدكتور : شفيك يا صالح .. سعود الا يتغشمر معاك ..

الشاب الضرير : قوله يا دكتور .. والغشمره فيها شئ .. ؟

الشاب المقعد : لا يا دكتور .. انت ما تعرفه مثل ما أنه أعرفه .. بتقول لا اله الا الله والا أعلم

الشاب الضرير : ها .. شقلت .. ؟

الشاب المقعد : من قال ها سمع .. شقلت ألحين ..؟؟

الشاب الضرير : ما أقول الا .. لا اله الا الله ..

الشاب المقعد : ايه ألحين عدل ..

الدكتور : فهموني شالسالفه ..

الشاب الضرير : ما عليك منه يا دكتور .. المهم .. أنه حاضر ومستعد آتبرع بدمي ..

الشاب المقعد : وأنه بعد حاضر يا دكتور ..

الدكتور : ايه نعم .. وهذا العشم فيكم .. المهم ألحين .. امسكوه شوي وخلوني أعطيه هالابره

وعقب لازم انعرف فصيلة دمه .. وعلشان نشوف من فينا فصيلة دمه مطابقه له

وعلشان يتبرع له ..

المررضه : وأنه مستعده يا دكتور .. (وهي تقترب منهم) وفصيلة دمي A-

الشاب المقعد : وأنه فصيلة دمي A+ (سعود لا يزال صمنا) .

الدكتور : وانت يا سعود .. شنهى فصيلة دمك .. ؟

الشاب الضرير : ها .. ايه .. فصيلة دمي .. (مترددا ومرتبكا) وش هالسؤال المحرج يادكتور

الشاب المقعد : الظاهر انه الحبيب ما يعرف فصيلة دمه ..

الشاب الضرير : لو سمحت .. لو سمحت .. انت ما تتدخل في هالمسائل الخاصه ..

الدكتور : المهم ساعدوني ألحين علشان أعطيه الابره .. وعقب بنتفاهم على موضوع التبرع بالدم .. يا الله يا منى .. شوفي شغلج ..

المرضه : أنه حاضره يا دكتور .. (ثم يبدأ الدكتور باعطاء المريض الحقنه) .

(المريض يتألم بشده) .

الدكتور : سلامات .. سلامات .. ما عليه .. تحمل شوي .. (مخاطبا المرضه) دخلي يدج في مخباه .. يمكن نعرف فصيلة دمه من بطاقته الصحيه ..

(المرضه تقوم بما أمرها الدكتور أن تفعل)

الشاب الضرير : وأكد يا دكتور ان البطاقه الصحيه بيكون مذكور فيها فصيلة الدم .. ؟

الدكتور : طبعا يا سعود ..

الشاب المقعد : وهذا سؤال ينسأل .. ليكون ذاكرين فصيلة دمك في الجواز .. ؟؟

الشاب الضرير : لا .. دمك خفيف .. يا بو دم خاثر ..

الشاب المقعد : وبعد عدتها .. قول لا اله الا الله .. قول ما شاء الله ..

الدكتور : يا جماعه .. أرجوكم .. خلونا نهدي شوي .. وما في داعي للنجره ألحين ..

الشاب المقعد : أول شئ يقول ما شاء الله ..

الدكتور : قول يا سعود وخلصنا ..

الشاب الضرير : لا اله الا الله .. ما شاء الله ..

المرضه : (وبعد أن تصفحت بطاقة المريض الصحيه) فصيلة دمه يا دكتور اهي الفصيله الصعبه والكريمه في نفس الوقت .. O+

الدكتور : لاحول .. وشلون بنوفر له هالفصيله .. ؟

الشاب الضرير : أقول منى .. ممكن اتجين صوبي شوي .. (المرضه تتجه اليه)

المرضه : أمر يا سعود .. ؟

الشاب الضرير : ما أمر عليج عدو .. (يناولها بطاقته الصحيه) ممكن تشوفين لي .. شنهى فصيلة دمي ..

المرضه : حاضره يا سعود (وهي تتناول بطاقته الصحيه) بس المفروض انك تكون عارف
شنتهي فصيلة دمك ..

الشاب الضرير : ما عليه .. اسمحي لي هالمره يا منى ..
المرضه : (بعد أن ترى البطاقه) للأسف يا سعود .. فصيلة دمك ما تناسب انك اتبرع له ..

فصيلة دمك AB

الدكتور : والحل يا جماعه .. حتى أنه .. فصيلة دمي ما تناسب اني أتبرع له ..

المرضه : في هالحاله .. ترى المريض بيضيع من ايدينا ..

الشاب الضرير : يعني شلون .. شبيصير فيه ..؟؟

الدكتور : أكيد بيموت من كثر ما نزف ..

الشاب المقعد : لا حول ولا قوة الا بالله ..

(في هذه الاثناء تسلط الاضاءه على الطفل المصاب بالتوحد والذي كان يستمع اليهم باهتمام)

(ينهض من مكانه ويتجه اليهم وهو يشمر عن ساعديه)

غانم : أنه أقدر أتبرع بالدم للمريض .. وفصيلة دمي اهي O+

(الجميع يفرح بهذا الخبر)

الدكتور : الحمد لله .. الحمد لله .. وأخيرا الله بيكتب له النجاه .. (وهو يقصد المريض)

المرضه : مشكور يا غانم .. والله يكتبها لك في ميزان حسناتك ان شاء الله ..

الشاب الضرير : ايه .. هذا الدم ولا بلاش ..

الشاب المقعد : حرام عليك .. قول ما شاء الله .. قول لا اله الا الله .. هذا طفل برئ ..

الشاب الضرير : ها .. ماشاء الله (وهو يتجه الى غانم) لا اله الا الله ..

الدكتور : شفيك يا سعود .. ليكون عينك حاره واحنا ما ندري ..

الشاب الضرير : ها ..

الشاب المقعد : الدكتور اكتشف بنفسه ومحد قاله ..

(بعد ذلك نسمع أصوات الطائرات تأتي من بعيد ، ثم تبدأ صافرات الانذار)

الدكتور : ياالله يا جماعه ومثل ما وصيتكم .. اتجهوا الى زوايا المكان ..

(حاله من الارتباك ، والجميع يحاول الاحتماء من الغارات الجوية)
(أصوات الطائرات تبدو قريبه من المكان ، ثم نسمع الانفجارات وصفارات الانذار وسيارات الاسعاف وأصواتها تقترب من المكان)
(بعد ذلك تهدأ الأصوات ويبدأ الصمت من جديد)
(يخرج الجميع ويجتمعون من جديد)
الشاب الضريير : واحنا لي متى بنتم في هالحاله .. ؟
الدكتور : ما عليه احنا لازم نصبر شوي .. وللازم تزيد ثقتنا بالله .. وأكد بيكتب لنا النجاة ..
الشاب المقعد : والنعم بالله ..
الممرضة : يا جماعه .. محد منكم شاف غانم .. (وهي تدخل الى المكان) .
الدكتور : وين راح .. من شوي كان هنيه معانا ..
الشاب الضريير : وين راح يعني .. لازم نشوف وين راح .. واحنا لازم اندور عليه ..
الشاب المقعد : ها .. ألحين أقدر أتحرك بكل حريه .. عندك استعداد أكون عينك اللي بتشوف بها .. واللي بتدور على غانم ..
الشاب الضريير : وآنه أقدر أستغني عنك ..
الشاب المقعد : ياالله اشوف .. اتحرك جدامي ..
الدكتور : لحظه يا جماعه ..
الممرضة : هذا غانم رجع (غانم يعود اليهم) .
الدكتور : وين كنت يا غانم .. ؟؟
الممرضة : ليش ابتعدت عنا .. ترانا تضايقنا يوم اكتشفنا انك هب موجود معانا ..
الشاب الضريير : لا تسويها مره ثانيه يا غانم ..
الشاب المقعد : ولا تنسى انك صرت واحد منا وفينا .. يعني ما نقدر نستغني عنك ..
غانم : أنه أبغي أقول لكم شئ ..؟ (وهو متردد)
الدكتور : قول يا غانم .. خير ان شاء الله ..
غانم : أنه حاولت .. لكن أبغي مساعدتكم ..
الممرضة : انت تأمر .. قول شتبي واحنا حاضرين ..

الشاب الضرير : لا اتردد يا غانم .. قول اللي تبنيه وبكل ثقته ..

الشاب المقعد : قول يا غانم ..

غانم : أنه لقيت الطريقه .. والى ممكن ننقذ أنفسنا .. من هالورطه اللي احنا فينا ..

الدكتور : شقلت .. شقلت يا غانم .. ؟

(الجميع يحاول الاستفسار من غانم)

الدكتور : لحظه يا جماعه .. قول يا غانم .. كمل يا حبيبي ..

غانم : أنه حاولت اني أفتح فتحه في الطوفه .. وعلشان ننقذ أنفسنا ..

الشاب الضرير : ابعدى والله .. وما يجيبها الا رجالها ..

الشاب المقعد : ممكن تسكت ألحين .. (وهو يخاطب سعود)

المرضه : لحظه يا جماعه ..

الدكتور : ووين هالفتحه اللي اتكلم عنها يا غانم ..؟؟

غانم : (وهو يشير اليهم الى مكان معين في الخفيه) هناك

(الجميع ينظر باتجاه المكان الذي يشير اليه غانم)

(الفتحة تتسع بشكل تدريجي ومع المؤثرات الصوتيه والموسيقيه المصاحبه)

(الوهج الضوئي الناصع يخرج من تلك الفتحة الضيقه ، الفتحة الضيقه تتسع رويدا رويدا وحتى تصبح فتحة كبيرة)

(الجميع يتجه الى تلك الفتحة الضوئية)

(اظلام وتنتهي المسرحية)

(النهاية)

(تمت بحمد الله)

المؤلفة / مريم محمد .

الدوحه في 2011/5/28 م .